

Nga Ratapu O Oketopa.

Oketopa 2. Ratapu 19 o te Tokotoru. Nga akoranga o tenei Ratapu mo te ngakau tawhito me te ngakau hou. E ki ana te whaki hara "Kua he matou kua marara &c." Na te ngakau tawhito tera. He pena te ngakau tawhito me te kakahu paruparu kaore e taea te horoi. No reira me rapu i te mea hou. Ma te mana o Te Wairua Tapu ka taea. Te inoi mo tenei Ra e ki ana "Tukua mai tou Wairua Tapu hei whakatika i nga whakaaro katoa o o matou ngakau." Kei te whakaatu te Rongopai i nga whakaaro o te ngakau tawhito, ara i te kupu a nga Karaipi i mea ra "E kohukohu ana tenei tangata." I a Kenahi 50:15 ka kitea nga mahi a te ngakau tawhito o nga tuakana o Hohepa ki a ia. (Korerotia te upoko) Ko te ahua o te ngakau hou kei a I Koriniti 13:4 ki 7.

Kupu whakarite:— Mehemea ki te nui nga maitai ki te taha o te kapehu ka kotiti te tohu a te kapehu. He pera te ngakau tawhito, kei te riro i nga whakaaro o te ao. Ma te ngakau hou ka tika nga tohu. I te Tuhituhi e whakaatu ana a Paora i te rereketanga o te ngakau tawhito me te ngakau hou (17 ki 19) Ko nga hua o te ngakau hou he pono (25) kaore e tahae, ka pukumahi, ka heatu i etahi o ana rawa ma te rawakore (28) kaore, e puta te kupu kino i te mangai (29). Te inoi a Rawiri:— Kia tiakina toku mangai e Ihowa: tiakina te tatau o oku ngutu. (Wai 141:3.)

Oketopa 9. Ratapu 20. Te kaupapa o nga akoranga mo tenei Ra ko te kupu nei "kia kakama ai o matou tinana o matou wairua ki te mahi i nga mea e pai ai koe." He maha nga tangata e whanga ana kia mutu noatu te tangi o te pere karanga ki te karakia ka haere mai ai. Na te kore e kakama o te wairua tera ahua. I te Rongopai tera etahi i karangatia ki te marena engari kaore i tapoko ki roto. Kotahi i tae pohehe atu engari pua mai ana ki te pouiri i waho rawa, ki te wahi o te tangihanga o te teteatanga o nga nui. I mahara a Pita kei te kakama tona wairua ki atu ana ki tona Ariki "e pai ana ahau kia haere hei hou moni ki te whare-herehere, ki te mate ano hoki." Ruka 22:23. Engari kaore i toru nga tangihanga o te tikaokao ka toru ana whakakahoretanga i tana Ariki. He tangata a Hona i karangatia ki te kauhau, na te kore kakama o te wairua o ana. (Hona 1:1-3). He aha te kakahu marena o te Kongo-pai? Roma 13:14 me Karatia 3:27.

Oketopa 16. Ratapu 21. Te akoranga o tenei Ra ko te "Kaha mo te Karaitiana." I te Tuhituhi ka whakaatu a Paora i te huarahi e kaha ai, ara te pono hei whitiki, te tika hei pukupuku te rongopai hei hu, te whakapono hei whakangungu rakau, te ora hei potae, te kupu a te Atua hei hoari. Kei whea enei kakahu? Kei te Iriiri, kei nga karakia, kei te Hapa Tapu. E ki ana a Paora "Ka taea e ahau nga mea katoa, he mea na te Karaiti e whakakaha nei i au. Piripai 4:13.